

四庫全書

集部

欽定四庫全書

江湖小集卷三十五

宋 陳起 編

芳庭斯植采芝集

山居懷舊隱

靜地獨登臨
虛閒稱此心
猿聲過木少
花影入池深
春殿依殘日
晴煙散遠林
因思南嶽寺
長起石床吟

金陵道中

望遠生愁思
淒涼處處同
青山迷舊塚
芳草蔽閒宮
雨

過城樓月潮迴鼓角風十年懷古恨多在六朝中

喜人歸幽棲

霄漢分携久吟懷思欲迷相逢春草外歸隱石房西
澗急禽聲少松搖月影低要知人靜夜猶自怯猿啼

水石山居

靜極青山裏松花滿石床春風思華嶽夜雨夢瀟湘
人影歸林薄猿聲出澗長心如無別事同此閉閑房

江村晚望

何處問歸程
蒼茫入句清
雲生峯頂白
月近水邊明
芳草連平楚
晴樓出遠城
此身南北外
漁火是閒情

登雲漢閣

高閣勢凌虛
天涯入望微
雲藏山鳥影
春滿野人衣
積雨催花盡
寒樵背日歸
焚香端坐處
似覺世塵稀

子規

遊魂如可見
況復雨霏霏
隔水樓無地
經春叫不歸
影隨芳樹沒
聲入野花飛
那忍東風裏
淒涼上客衣

幕春感懷呈勿齋提舉

浮世事非真
嗟多白髮新
身居京寺久
夢到石橋頻
日落煙生樹
花殘草自春
坐看今夜月
應與舊房隣

長洲夜泊

吳楚昔曾遊
淒涼滿客舟
因思千古事
空起十年愁
目盡他山少
江流遠地秋
今宵猶有月
不似庾公樓

寄梅叟法師

一從飛錫後
迢遞各天涯
春事隨流水
行人問落花
住

當南嶽寺門對赤城霞遙憶焚香處松高月影斜

金陵懷古

天津橋上望如在玉門關月過東西浦江分遠近山淒涼三尺墓興廢六朝間千古登臨地寒潮自往還

送覺上人

送君千里去又見落花飛水國今宵別天涯隔歲歸岸多春樹密灘小夕陽微後夜扁舟月應逢宿鳥稀

訪故人

石榻相期久間尋到野房春歸芳草暗雲入楚山長人
影分孤驛雞聲落曙桑淒涼千古事回首兩茫茫

寄深居馮發管

相懷千里外空望極遙天處世惟今日看花憶去年春
風生島樹夜月滿漁船此後閒尋處應須借榻眠

寄靜佳朱明府

翰苑留名久城邊半掩扉聲隨淮水遠吟入楚天微吏
靜看山坐鄉遙撫劔歸清虛無別事嘉政在璇璣

旅中寄故人

世路長安裏三年別釣磯只因吟事僻寧免識人非性
拙趨時少家貧過客稀春風歸去日同採故山薇

西園即事

一徑落花紅回廊復舊蹤千峯遙隔水萬木遠涵空沙
鳥晴雲外寒帆夕照中幾宵曾宿此江月夜相通

旅中偶成

風吹客袂寒飄泊在長安對雨春題盡看雲夜坐殘遠

山平楚水蒼漢接吳灘遙憶天台寺相攜去不難

懷芳林處士

相思不可見江路正迢迢煙樹同吟遠關河入望遙
長花影轉風定篆香銷遙憶君居處鐘聲隔暮潮

送靈耀之姑蘇

一身惟在道清苦獨知君世路終成別山光不共分
天寒欲雨春樹夜生雲此去他鄉寺猿聲各自聞

元夕

滿眼春光萬物華
小橋楊柳近人家
誰將上下樓臺月
化作金蓮一夜花

偶成

東風玉勒馬蹄輕
多少遊人上鳳城
燕子不來春寂寞
海棠花發近清明

邊上

邊風斜日下長城
春到年年草自生
萬里戰場兵甲靜
近來應少北人行

山家

一溪流水遶烟霞
路入青松第幾家
胡蝶傍人飛不去
隔牆開盡碧桃花

晚來

晚來無語立東風
一片閒情在碧空
人老杜鵑渾不管
柳花飛盡夕陽紅

西湖晚望

久雨初晴睡正長
春蛙鳴遍舊池塘
小亭寂寞斜陽裏

一陣東風過木香

寒食

江南江北紙錢飛處處人家拜塚時杜宇不禁寒食雨
五更啼血上花枝

堤上

楊柳垂絲拂畫船杏花零落斷橋邊半山煙雨東風惡
更向西亭聽杜鵑

林間

猿鶴忘機不計年
芭蕉晴綠半平簷
青山似與身相入
盡日無人自下簾

客懷

杜宇聲殘客興頻
柳花飛絮滿江濱
可憐波底蛾眉月
猶照他鄉夢裏人

夏夕雨中

滿林鐘磬夜偏長
古鼎閒焚柏子香
石榻未成芳草夢
西風吹雨過池塘

過吳

柳橋槐市暫經過
飄泊汀洲得意多
夜月已忘吳主恨
畫船空有采蓮歌

清華夜坐

開盡黃花滿短籬
靜聽隣屋夜敲碁
清華池上三更月
僧在松邊未有詩

山居

晚策登臨日欲斜
小溪流水是生涯
道人睡起鶴飛去

開盡青松一樹花

春夜

玉樓臺畔柳生煙
況是春風杜宇天
一片月光涼似水
半扶花影上鞦韆

古樂府

攜君石上琴彈我
窻前月月缺又還
圓誰能免離別
青山叫子規行人
淚如雨子規不肯
歸行人不能去
欲買采菱船野水
無人識野水去不
迴迢迢暮山碧

早作西州行幕作西州宿楊柳忽風生年年芳草綠
蘭死根亦香人死不知處人死不堪悲蘭香化為霧
山雞啼一聲深院日當午世無同心人入此薜蘿裏
晚步入松陰斂霽人影絕惟聞太古音聽之心膽裂
一入經戰場白馬不足數白馬不敢嘶春風在場圃
青雲千里心白露一點雪誰將玉笛吹吹下關山月

寄衣曲

自君之出矣壁上琵琶君記取日日望君君不歸自君

去後徒相憶欲剪征衣寄贈君天涯望斷無消息

自君之出矣欲寄征衣淚如雨征衣未寄心已悲一寸
相思隔千里湘江水是巫山雲巫山雲是湘江水湘江
兩岸芳草深湘江日夜多行人行人去去天之涯門對
落花三兩家家有酒謳且歌醉來月下彈琵琶

韜光庵

石澗長松行十里杖藜從此得遲留青霄望去山河遠
白水看來日月流老樹葉殘霜鬼哭斷崖雲冷洞猿愁

韜光名在身何在今古茫茫幾白頭

旅懷

十年不倚謝公樓滿眼淒涼上客舟往事盡隨流水去
青山長憶故人遊海門風起天將暮渡口雲生樹欲秋
絡緯自啼花自落更堪回首是他州

賦老將

和官字韻

獵獵征旗促曉鞍幾回臨陣練兵官黃沙滿塞黃雲暗
白馬嘶風白日寒漢語肯隨蠻地改戰袍猶帶血腥乾

如今鶴略渾無用瘦骨蕭條甲冑寬

過桃源

闕

生涯心在鳳凰臺桃花曉落水流去

山鳥晚啼風送來古樹影搖霜月滿冷猿聲裂碧雲開
長關春有愁人分驛馬相逢去不回

過故城

故城深巷長蒼苔一度經過一度哀尚有樓臺攬雨出
豈無花柳向春開十年心事今宵夢千里家書昨日迴

莫上灞陵橋上望
楚天雲盡蜀波來

挽周彥良

白首功成未十年
寡妻相弔泣江干
詩名似水聲還遠
世事如雲夢已殘
楊柳滿堤人去後
海棠深巷雨初乾
東風忽起青山淚
雖有君書不忍看

思歸感興

久客空江上
閒吟對石門
青山非遠近
流水自朝昏
夜月添鄉夢
春風入燒痕
翻思南郭路
迢遞隔煙村

蘭谷

空谷寄深雲靈根自不羣地閒平草長香遠隔溪聞靜
與騷人佩清同楚客分惟應千載後餘韻在湘濱

多福寺

野鹿自成羣山中少隱君鐘聲兩寺合人語一溪分泉
響松間雨苔生石上紋多年僧住此半榻鎖閒雲

挽芸居秘校

世上名猶在閒情豈足悲自憐吟日少惟恨識君遲蘭

閤人亡後寒林月上時十年青史夢只有老天知

與子入山來

與子入山來求夜不得睡但聞松子聲敲落梧桐樹月
到窻愈明秋風瀉流水古奏三兩絃知音不知處惟有
白面猿閒中自來去

春晚

六言

滿地落花流水傷心芳草青時江上數聲杜宇更堪一
笛橫吹

寄勿齋提舉

滿林煙樹已紛紛
溪水猿聲不共聞
惟有青山半庭月
夜深應與故人分

門柳

看盡門前柳
愁多白髮新
灞橋風雨夜
離別是何人

遠山

萬里色蒼然
春煙夕照邊
舊過南岳寺
曾向雨中看

石城秋夜

漠漠青山水自流
西風煙樹幾經秋
舊時歌舞人遊地
月滿江城十二樓

春日同友人遊湖上

十里湖邊路垂楊
映馬蹄水光平野闊
山影繞樓低夜雨
生青草春風濕紫泥
興來無限意同此
片時題

巖棲分韻得深字

寂寞空齋裏閒情起
暮陰路長沙鳥盡
人在翠微深遠
樹煙中沒寒花竹
外尋自嫌名與利
誰識此生心

邊城客思

客裏厭芳塵淒涼又問津向南人去遠歸北馬嘶頻野
水荒城暮孤舟海樹春故鄉非久別已覺鬢毛新

吳中即事

世事交情淺傷心獨倚欄海雲經雨重秦樹入秋殘潮
落吳天遠風生夢澤寒英雄千古地回首是長安

過越

渺渺天涯路扁舟去不窮水花隨岸盡山影落江空往

事千年夢漁歌一夜風詩成惟有月清致與誰同

天台山居

對雨吟方穩西風忽晚晴野花沿澗白秋意入簾清淺
水藏魚影重林隔磬聲是非塵外事誰可繼高名

故宮懷古

暮天雲盡遠山空夜夜西風入漢宮鐵笛一聲千古恨
月明人在女牆中

落葉詞

片片飛來總是秋更於何處復添愁
自憐枝上無收管却帶慙慙出御溝

暮春雨中感懷

回首郡城東春殘碧樹中
落花千點恨踈雨一簾風
白雪侵新鬢歸心逐斷鴻
茫茫事如此何必怨途窮

江寺晚眺

盡日無多事閒行一徑陰
人歸秋寺晚月滿夜堂深
海闊頻生霧城荒遠見林
青山與華髮空愧百年心

照影

性與兒童異飄蓬二十年照來池上影恰似未生前

世事

世事皆浮雲人間幾朝暮不知溪上山猶有桃源路

莫恨

寂寞雲深地山空葉落時自憐為隱僻莫恨月來遲

昨夜

草堂雲去後人境兩茫茫忽見青松老翻疑昨夜霜

長安曉發

雨過樓臺已禁煙
野風吹絮滿長安
夜來寂寞沙汀下
楚水吳雲一樣看

聞子規

十年已起故鄉情
客裡淒涼不耐聽
啼到蜀天空有恨
水流依舊月還明

自謂

自謂清貧苦那知
即是安路從平去
好事到口開難松

老心長在花紅色易殘浮生既如許渾作夢中看

宿雲山房

縹渺沉虛碧清池見宿雲松聲臨石斷山影與泉分芳
草經年夢幽禽隔徑聞倚欄吟未盡紅日又將曛

偶成東續芸

相看又一春花亂馬前塵湖海他鄉路煙霞幾處人草
連閒地遠鳥入暮山頻多少淒涼事那堪白髮新

鐵笛倦長吹

鐵笛倦長吹虛空劍寒倚俯仰陰晴天泰山不可視蕩
槳歸白雲回首滄波裏人生無百年世事已如此既與
榮辱同興廢乃相似春風從何來紛紛競桃李至士本
無心誤為詩所使縱步夕照間養性在芳芷天涯一夜
杜鵑愁萬里行人渡湘水

對梅分韻得堂字

霜風吹短髮值此天氣涼行行陰壑中萬樹皆含芳相
對發微詠安用持華觴嗟彼咸平人清風生我腸花非

不及時衆鳥何迴翔歸省兩壁間畫者猶蒼蒼抱此幽
露姿願登君子堂

老去

老去厭芳菲思歸未得歸夕陽溪上樹花作去年飛

苕溪舟次

扁舟煙重冷漁蓑兩岸人家浸小河芳草自生春自老
落花隨雨晚風多

送故人之江東

鳳城花氣浥旌旗又見東風上馬時不是灞橋難話別
垂楊空折去年枝

丙辰元夜

淡河斜浸月光浮看盡青山更倚樓殘燭怕寒元夕夜
小欄花影伴人愁

清明

堤上尋春步較遲馬嘶芳草燕差池南樓烟雨清明日
正是佳人墮淚時

江淮傷感

水流花片濕輕紅多少英雄
逐曉風三百餘年歌管地
數聲歡怨不相同



江湖小集卷三十五

欽定四庫全書

集部

江湖小集卷三十六至

詳校官中書臣張姚成

助教臣常循覆勘

覆校官主事臣龔敬身

校對官助教臣胡予襄

謄錄監生臣張曾誼

欽定四庫全書

江湖小集卷三十六

宋 陳起 編

芳庭斯植采芝續稿

送故人之天台

新綠又成陰歸期直到今人行芳草遠犬吠落花深野
店春寒雨江城橘樹林無情名利事休繫一生心

送敏上人歸永嘉

風光苦變遷客裏對殘年別我此時路問鄉何處船斷

雲連雨雪落日遠人煙又向龍湫畔開扉近瀑泉

上竺寺

古寺寒橋路鐘聲靜忽聞數峰平處合一水衆谿分老
樹烟蘿雨殘燈石塔雲間心寄幽寂似覺遠塵紛

山中即事

千峯當此境誰可共登臨月過秋池靜雲歸古木深懶
觀前去事已悟未來心更欲尋詩伴相攜向石林

對梅寄人

欲問江梅信
嗟筇帶晚霞
笑看今日樹
開過幾年花
踈影生來瘦
寒枝折處斜
要教人寄遠
何地是君家

春日

人生厭別離
老去更何為
獨對清明雨
閒吟社日詩
野蜂生蜜早
海燕入簾遲
未盡尋春興
應須愧後期

夜坐有感

角送重城月
微風入夜涼
身輕長是寄
嗟苦未應忘
坐久燈成燼
愁多鬢欲霜
百年還老去
誰可繼餘芳

送人之吳

無心學隱淪此去向吳津
千古是非地一燈煙雨村
烽塵連楚戍榆柳隔淮春
別後新吟句何人可共論

題天竺巖栖山房

一室寄雲隈憑欄日幾回
無風山自雨有主燕還來
野徑通樵遠巖花向晚開
舊時題數壁今已半蒼苔

丁巳燈夕前六日觀挹拙寄敏齋韻因事有感
走筆以賦

萍跡倚春風春光苦未濃
人間連日事塵外一宵鐘
遠鴈書難寄殘碑字已封
幽人住城市清夢兩三重

送隱士游京淮

送君湖柳下未別已關情
古塞去程遠寒江入夢清
野雲低水樹山雨閉春城
到處逢知己虛傳隱姓名

雨夜

雨雪寒窻下孤燈夜不眠
衰殘如舊日榮達是何年
已覺觀書妄方參入世緣
存心在仁理何必後人傳

晚春偶題呈政甫先生

老來春去怯凭欄
今古興亡一笑間
滿徑落紅人不
到
杜鵑啼雨入空山

山居遣興

山寺閑脩竹
偏宜靜者居
觀空心已悟
集理事常虛
日月供吟筆
乾坤入草廬
何如釣臺叟
得計在樵漁

登吳山

嵯峨宮樹靄晴空
吳越迢迢一望中
幾處笙歌入遠近

萬重花柳路西東
風生簾幙春雲碧
水遶樓臺海日紅
沙鳥自飛還自宿
百年無計與誰同

題彭澤後人吟樓

結屋在雲端悠然趣自安
江南隨望遠星月近人寒
歛氣當空正詩情對酒寬
往來庭畔叟只作晉時看

挽白雲趙宗丞

天上樓成日人間獨喪君
料知生死事還與去來分
夜月江村路春風嶺樹雲
交餘多感慨那忍見遺文

遣懷

愁極鬢成絲
滄江夢未歸
鳥啼山雨急
春盡故人稀
曉潤侵吟壁
寒雲繞竹扉
向來詩滿束
應是與心違

秋思

雨過山城日又西
西風一陣木犀開
莫將心事憑秋鴈
恐帶邊愁入夢來

客路和胡元魯出入韻

十載天涯客
浮雲不定身
烟波春雨渡
燈火夜漁村
世

事空為累人心未覺仁何時留片石歸老古松根

淮邊柳

寂寞淮邊柳春來自舞腰恨生爭戰地不得近官橋

雪鵠

風吹蘆葦鳴殘雪滿橋板不見棹回人愁立沙河晚

鳴鳩

何處芳草多相呼向深塢竹外立寒枝山南又春雨

道宮

千年興廢地仙訣字猶存露重雲生樹壇空月到門心
清無外事靜極是真源此境非凡世何人與續言

淮北

兵戰何時息邊城染客旌亂鴉啼又歇荒草死還生島
雨連秋曙江風入鴈聲近淮民自悅應是宦情清

東齋書事

客裏吟情懶天涯望欲昏斷雲流澗水殘月照衡門猿
嘯它山樹砧聲何處村浮名身外事於此不須論

傲樊川體

吟邊繞架書千卷壁上梅花水一瓢
世事盡從忙裏過
年華空向靜中消
山雲宿雨籠殘日汀草浮香滿小橋
對此不須惆悵去野人今已悟吹簫

觀化

閒觀造化餘靜極悅自性胡蝶忽飛來
吾心已無競
和路字

青山何人家芳草滿樵路猿鶴未歸來
殘月照烟樹

宿雲軒

千峯雲未還
數樹芭蕉綠
風雨暗黃昏
何人共幽獨

從軍行

茫茫塞月籠寒霧
萬里征人不知數
年少難消壯志多
精銳連營肅貌虎
從軍何日見軍迴
但見日日長淮雨
烽煙散漫滿路岐
邊聲颯颯秋風起
天涯荒草馬成羣
放去彎弓亂飛舞
夜深更聽胡女歌
古來白骨多於土

湖上晚望

繞堤楊柳暗漁舟二月風光淡似秋幾度笙歌人散後
夕陽依舊滿紅樓

送人謁所知

西風忽別離滿袖百篇詩取已尚如此問人應可知山
寒城角遠地闊海帆遲料想回車日相看是歲期

山中寓意

白髮今如許自吟還自愁滿山晴葉雨四壁老蛩秋看
水知心靜觀雲覺事浮數年衰感意揮淚不能收

丙辰季夏避暑山中長松脩竹恍若蓬萊異人
之居走筆索句以紀其事

六月厭煩襟縱步情未足愛此石徑長渺渺清溪曲古
道何人居門間對脩竹好鳥發新聲靜極成幽獨山風
吹晚涼山影搖紅綠翹首興未闌青猿睡初熟

送人遊吳

闔門煙靄外地闊水城高蜃氣蒸吟鬢霜風入緼袍數
程秋岸雨一飯野船蒿若問當時事人誇有二豪

丙辰季夏雨中

天涯身尚寄何日向東州一夜霜欺鬢連朝雨送愁夢
多吟作祟閒極懶為讎若問浮生事無心即是謀

寄彭澤後人

不為折腰事田園足野情筆粘春霧重詩帶晚唐清柳
巷間漁艇山扉對水城論心暫來往無愧遠公名

寄靜佳朱明府

傷心獨立舊池臺日日西風送雨來別後思君無限事

一封書發兩番開

葉

天涯誰與寄相思殘片踈踈尚戀枝
一自西風寒勁後凋零能得幾多時

柳

汴水隋堤總寂寥春風吹恨未曾消
長條本自無拘束也向人前學舞腰

春陰書事呈正甫先生

二月花陰已覺遲
黃昏簾幙燕歸時
小欄獨立無人處
春雨春寒總欠詩

江湖寥落轉飄蓬
歸夢年年逐去鴻
吟鬢一番春又半
杏花無語立東風

金陵道上

一望江山去不迴
斷碑荒草舊宮臺
六朝陳跡皆如夢
夜夜寒潮送月來

山行

巖邊結屋與樵隣
流水桃花幾度春
行到碧雲無盡處
深山怪木老如人

詠古

欲尋仙闕覓仙丹
仙在瀛洲縹緲間
一自祖龍東去後
更無人到會稽山

送張十二秀才至維揚

江山迢遞水東流
芳草無情管別愁
苦聽春風商女曲
天涯人在古揚州

偶成

漁歌聽盡欲狂吟
一徑人家柳影深
天意似嫌花信早
東風吹雨又成陰

雪中寄巖泉

吟罷新詩祇自看
曉風吹恨上闌干
夜來雪滿前山路
誰對梅花說歲寒

春日湖上五首

繞堤蓑草綠纖纖
老裏吟情覺未厭
應是踏青天氣近

柳條多插野人簷

曉山漠漠盡煙霏四面樓臺白鳥稀
芳草年年湖上路
柳花風送釣船歸

樂天遺跡暫徘徊路入深雲滿徑苔
花影上欄吟未穩
東風空倩蝶飛來

雨餘蛙吹歇池塘庭院人間日正長
獨倚畫欄看不盡
海棠無處是山光

今朝纔得是閒身來往琳宮不厭頻
驚茸舊巢春又暮

風光一半屬遊人

與趙五話別

送君無計路漫漫
玉笛聲悲遠戍間
自是行人多有恨
離情吹不到陽關

首夏

新篁搖綠雨初晴
彩簾風生一枕清
昨日小亭幽夢覺
隔簾花影弄鶯聲

湘竹詞

湘寬何自怨千古尚名存不種庭邊竹那知有淚痕

池上曲

曉雨生池荷圓珠漾新綠入手不成珠空歌采蓮曲

詩志也樂於情性而已非所以有關於風教者
近於覽卷之暇心忘他用得之數篇目之曰續
稿然不可謂之無為也寶祐丙辰良月望日芳
庭斯植書

江湖小集卷三十六

欽定四庫全書

江湖小集卷三十七

宋 陳起 編

劉過龍洲道人詩集

襄陽歌

十年著脚走四方胡不歸來兮襄陽襄陽真是用武國
上下吳蜀天中央銅鞮坊裏弓作市八邑田熟麥當糧
一條路入秦隴去落日彷彿見太行土風沈渾士奇傑
嗚嗚酒後歌聲發歌曰人定兮勝天半壁猶堪扶日月

買劍傾家貲市馬託生死科舉非不好行都分萬里人
言邊人盡麗材卧龍高卧不肯來杜甫詩成米芾寫二
三子亦英雄哉

從軍樂

蛟龍寶劍礪鞬刀黃金絡馬花盤袍臂弓腰矢出門去
百戰未怕臯蘭麝酒酣縱獵自足快詩成橫槊人稱豪
但期死處得其所一死政自輕秋毫將軍三箭定天山
丞相五月入不毛生前封侯死廟食雲臺突兀秋山高

書生如魚蠹書冊辛苦雕篆真徒勞
兒時鼓篋走京國漸老一第猶未叨
自嗟賦命如紙薄始知從軍古云樂

盱眙行

車徐行馬緩馳天寒游子來盱眙
功名邂逅未可知生身畢竟要何為
既不視草黃金閨又不陪宴白玉墀
何不夜投將軍扉勸上征鞍鞭四夷
滄海可填山可移男兒志氣當如斯
安能生死困毛錐八韻作賦五字詩
金牌郎君黃頭兒有眼不忍重見之
志大才疎浩無期逢

人舉似人笑嬉謂為癡兒未必癡喚作奇士何能奇

登昇元閣故基

脚力倦矣盍少休侵晨更作昇元遊眼中已不見二百
四十尺之高樓但見炊煙萬竈宿貌貅上有啼鴉噪鵲
如泣訴下有老樹根據枝相蟠想其結締初匠石巧與
造物侔楠櫟析拱不知幾大木一木牽挽回萬牛山川
退聽左右愛約束日月烏兔早暮東西流阿房之旗矗
立矮如戟臨春結綺望仙三閣俱下頭太行孟門培塿

而已矣蹄涔洞庭芥為舟拄撐霄漢彈壓大千峴下歷
梁唐晉漢周一朝世故有反覆禍結祝融回祿與鬱攸
灰飛障天烟焰熾一火三月爛不收遂使觚稜化草莽
丹雘成墟丘吾聞至人侈儉初何心有茅一把蓋頭便
可留何必窮極土木事妖怪股削赤子膏血斂以哀是
故子劉子不仙不佛亦不侯視鸞臺鳳閣為蘧廬百萬
買宅亦夢幻泡影漚沍西豈無冢白沙翠竹泉石幽茅
簷曝日搔背痒籬缺牆破手葺修爭如以天地為室廬

日日行住坐卧得自由不為朱門是不作白屋羞可時
騎鯨千里遊汗漫有時蛤蜊踞食龜殼秋彼昇元閣者
亟成而復壞腸亦不能為之斷心亦不能為之憂造物
何足云此身似贅疣譽堯毀桀未必公是非丘跖兩窖
蟻與螻日斜請公急下山我有斗酒歸去來兮相與勸
酬

憶鄂渚

我離鄂渚已七年吳兒越女爭華鮮不知上游占形勝

四十餘萬兵籌邊中原地與京襄近烈士烈分猛士猛
澤連雲夢寒打圍城接武昌曉排陣書生豈無一策奇
叩關擊鼓天不知却思仙人白玉笛胡床醉倚南樓吹
貂蟬兜鍪兩岑寂若耶溪畔還行客空餘黃鶴舊題詩
醉筆顛狂驚李白

題多景樓

金山焦山相對起挹盡東風大江水一流空斷水中央
收拾淮南數千里西風挹酒閒來遊木葉漸脫人間秋

烟霞微茫霧杳靄神京望斷雙淚流君不見王勃文名
能蓋世當時未遇庸人耳琴書落拓豫章城滕王閣中
悲帝子又不見李白才思真天然時人未省為謫仙一
朝放浪金陵去鳳凰臺上望長安我今四海行將遍東
歷蘇杭西漢沔第一江山最上頭天下無人獨登覽情
高思遠愁緒多樓乎樓乎奈汝何安得李白與王勃名
與此樓長突兀

辭周丞相

一曲歸歟浩浩歌世間無地不風波人從貧賤識者少
事到艱難省處多紫塞將軍秋佩印玉堂學士夜鳴珂
太平宰相不收拾老死山林無奈何

送術者

一性圓明俱是佛四方落拓便為仙逢人只可少說話
賣卜不須多要錢退一步行安樂法與三個好喜歡緣
老夫亦欲挑包去若要相逢向酒邊

紅酒歌呈京西劉漕

立義

桃花為麴杏為蘖九醞仙方得新法大槽迸裂猩血流
小槽夜雨真珠滴岷山之北古襄陽春風爛漫花草香
乘輅誰為部使者金閨通籍尚書郎兒樣愛民如父母
十萬人家感恩厚鵝兒不酌宜城黃流霞造此江南酒
輪蹄日日行樂同琥珀潑灑琉璃鍾珊瑚枝下貴公子
人面日色相爭紅闌干十二開簾幙腰鼓轟雷奏仙樂
翠翹金鳳大堤倡玉纖捧勸羅衣薄人生百歲能幾何
海棠花開春較多有貂可解換一斗醉到天曉待則麼

送王簡卿歸天台二首

王居安字賓道一字簡卿台州人淳熙十四年

丁未
探花

欲數人材難倒指有如公者又東歸班行失士國輕重
道路不言心是非載酒青山隨處飲談詩玉麈為誰揮
歸期趁得春風早莫放梅花一片飛

千巖萬壑天台路一日分為兩日程事可語人酬酢易
面無慚色去留輕放開筆下閒風月收斂胸中舊甲兵
世事看來忙不得百年到手是功名

清溪閣次胡仲方韻

瓊樹枝新梅蕊迸與君攜手清溪閣舊時狎客歌舞場
何似詩人風雪逕溪邊傑閣高峻增左右華屋連飛甍
依稀王謝鳴珂里彷彿秦箏雲母屏古來繁華各衰歇
只有不磨惟壁月小船何處載愁來哀怨一聲吹笛裂

答曹元章

先生修廉隅日日自謹畏老夫寄杯酒狂亦非所諱酸
鹹雖不同各自有正味切勿對癡人說夢其詞費

次劉啟之韻

豪傑交遊三十年暮年識于海霜邊
江西析派詩同社鴻寶傳家子已仙
無用白鬚甘我老有才青眼望誰憐
譬如飄泊溫城下篁竹蕭疎無管弦

簡季文

衰鬢蕭騷半欲絲尚能隨隊作兒嬉
棋無殺意從人活琴有仁聲却自悲
落拓陳平歸漢日中傷張祿入秦時
諸公莫作狂夫看恐是英雄未可知

贈陳時可

交遊半世已公卿猶抱遺經對短檠
負米過于扛鼎重選官難似上竿行
百年母子命相倚一片孤忱誰與明
烟火小樓風雨夜歲寒時得話平生

挂搭松窩

十年南北走東西豪氣崢嶸老不衰
快斬妖魔三尺劍浪吟風月五言詩
山無福地吾焉往神有靈丹世不知
却恐松窩知此意一包挂搭更何疑

寄呂英父

清時蕭瑟坐才疎，收拾窮愁却著書。
詩筆有神通夢寐，丰標不俗更清臞。
黃花細雨桐江路，落日西風處士廬。
抖擻塵埃舊時帽，不妨覓句倒騎驢。

秋到家山冷不知，但驚風露入新詩。
低頭欲拜無東野，滿耳惟聞說項斯。
骨骼昂藏雲葉瘦，吟哦淒斷雪猿悲。
文章已得真消息，三十科名未是遲。

寄趙湖州侍郎

桑柘村村烟樹濃
新秧刺水麥梳風
舟行苔雪雙溪上
人在蘇杭兩郡中
鼓角麗聲相旦暮
旌旗小隊間青紅
主人夙有神仙骨
合住水晶天上宮

喜雨呈吳按察

使君人物舊烏臺
天聽雖高力挽回
湖水欲平江為退
秋田未旱雨先來
雲隨黃鶴遊何許
風滿南樓亦快哉
涼意入秋清可畫
月岩知有桂花開

上劉和州

煒

戟外梅花角有聲使君心與月華明
郡常米石今衝要船在烏江罷戰
爭酒賤人家歌袴飲地寬客子賣刀耕
太平官府無公事見說香凝燕寢兵

草樹荒寒脫葉枯又尋短棹汎焦湖
場經古戰心欲折客老諸侯饑更驅
去國寂寥今白眼籌邊謀略看鴻儒
袖詩來謁君應記曾說揚州厠坐隅

游靈巖

風露淒然八月秋瘦藤扶我到山頭
僧居突兀飛鴻上

人跡依稀任鹿遊舊事已空流水在閒情都付落花休
越王未是真嘗膽計出嬋娟事可羞

觀白鷺洲風濤

一聲雷鼓挾風威頃刻衝濤沒釣磯行客驚看銀漢落
陽侯擎起玉山飛蛟龍便爾爭先化鷗鷺茫然失所依
安得長竿入吾手翩翩東海釣鰲歸

自宣溪過早禾渡

雨後斜陽未見暗曉看紅日報憲明筍輿十里宣溪路

剗地濃雲脚裏行

梅欲挽春菊送秋早禾渡口晚煙收風從灘上催船過
滾起寒沙一併流

西湖

西湖湖上山如畫二十年前曾客來飛絮滿前一作城歸
未得江南老却賀方回

贈宗友

中吳喜遇同宗友貌古髯疎志亦高金玉圖書皆長物

六經之外有離騷

弋陽渡

車聲盡日滑黃泥
怕聽空桑叫竹雞
風雨不知春早晚
柳條搖綠半江低

書僧寺壁

綠楊染水濃如畫
天氣欲晴風自和
二月杏花猶未放
一春分外覺寒多

夢覺

夢回斜日轉花陰時有黃鸝送好音
高卧草廬人不識
東風啼鳥獨知心

春歸

百花開盡到荼蘼一片春心又欲歸
可恨東風留不得
漫教啼鳥怨斜暉

春日書事

薄雲隴日護初晴沙岼潮來水又生
閒傍柳堤騎馬去
一鞭春色柳風輕

深林路轉午雞啼知有人家住隔溪一塢開紅春意動
酒帘正直杏花西

光陰卒卒一飛梭如許頭顱奈老何狼藉落花春不管
竹雞啼處雨聲多

感舊

羅結同心柳帶青碧桃香裏記將迎春風重到憑欄處
腸斷紅樓不忍登

和危府教

先生場屋文之虎氣懾狐狸自不知老去莫嫌官尚冷
灞橋風月要新詩

梅花

凍雲垂垂雪欲落雨益風慳如此寒分付南枝與君看
老夫自要北枝看

村店

谿邊獨棹酒船回冷水灣頭雨意開一路有詩吟不穩
當初悔不共君來

平氏書院

雪屋彈琴泛作聲
四無人語紙窗明
倦遊識彼諸緣妄
心與梅花一樣清

呈王山父二首

疎烟淡淡樹重重
略得西南有路通
鐘板不鳴山寺靜
閉門人在月明中

辨得茅廬我便歸
玉堂何處有梅枝
歲寒老樹雖荒寂
會有臘殘春到時

游清潭呂子益蟠谷五絕

清潭

一潭清水淨無泥
潭岝無沙石有磯
擬待月明垂釣去
前溪雨足怕龍歸

蟠谷

逶迤路逐驚蛇去
轉盼不知身已高
雲未萬重山四合
碧油幢外有旌旄

飲綠

野花紅白倚巖開只在臨風自一杯謹勿放教公子見
恐攜窈窕入山來

含輝

濕雲將雨過溪東石澁灘鳴水勢雄忽作晚晴秋更好
月來林外透玲瓏

香徑

一花帶蕊香氣滿何況蘂生樹兩行風露益高秋雨足
請君來此撼琳琅

游郭希呂石洞九絕

清曠

筍輿咿啞來路轉此歇脚長風挾秋下清蒼滿萬壑

深秀

青蒼萬山中窈窕一徑開請回俗士駕切莫呵殿來

書院

力學如力耕勤惰爾自知但使書種多會有歲稔時

桂壑

藂藂樹枝紫羅生
襟松篁不以岩穴幽
歲晚政自香

高碧

小山碧嶢巖直上
與天齊詩成欲磨崖
藤蘿費攀躋

石丹

銀牀遶週遭一規寒
浸水試敲拄杖看
恐觸蛟龍起

壺天

逆漢隨水行更上
紫翠峰朱欄忽飛閣
映帶烟霞重

玉佩

借榻卧雲屋倚枕子細聽誤疑鳴珂聲不知水泠泠

韜玉

至寶不自獻韜藏亦英華餘香被草木秀擢幽巖花

湖口阻風

冒雪衝霜已十程狂風迺敢逆吾行無人說向江神道
莫待明朝亦世情

蘄州道中

如箭陰風劈面吹雪花斜夾雨垂垂胸中自有平戎策

路入蘄州冷不知

聞鶯

東風扶日上花枝
恰恰幽禽弄暖時
百轉忽驚春夢破
間關石上話相思

閒步

山徑無人鳥篆沙
杖藜閒看摘新茶
錦綳委地笋翻籜
黃玉滿林松帶花

古仙巖

白蘋風裏步清秋來作靈巖古洞遊
笑倚飛雲訪仙跡
夕陽無語伴人愁

寄沈仲居

十年鉛槧鬢絲秋獨抱成書四海遊
三國諸人應夢覺
一番公案又從頭

萬死中原百載爭流芳遺臭各垂名
思量陳壽已饒舌
又費先生幾管城

贈經長老

菜肚老人禪已飽
愛人從史作詩僧
客來無處著歡喜
一語不曾談葛藤

題東林

爾自貪癡不肯閒
江南多少好青山
老夫為不愛官職
買得狂名滿世間

王農丞舟中

危檣高占飛鴉宇
京淮兩路傳宣使
面如玉盤腰有金
見說京淮已無事
儒生性命何足憐
十年厭聞鼙鼓喧

一朝悔禍亦不惡且願四海皆安眠

舟中

扁舟上灘風怒惡舟入深溪雪花落我行無事有底忙
且向荻花深處著鄰船乞火炮蛤蜊樽中濁醪把一卮
淘淘萬里不復理凍口且吐酸寒詩

吳尉西亭

襲桂行香徑朱闌稍轉西水風颭石冷雲月墮簷低棋
敗深杯罰詩豪健筆題舞忙釵鬢亂誰為捧柔荑

聿追菴題壁

路轉羊腸曲山回蝸角深木多成密蔭水少亦悲吟露
草重陽淚風花寒食心摩挲墓銘看久立石碑陰

歸耕

途窮百無成或許營菟裘依然大槐宮蟻穴夢封侯人
生眠飯耳物外亦贅疣科名付諸公老矣吾當休

游古山

信步作幽計有菴如此深佛燈明老屋秋日淡疎林栢

樹祖師意松楸老子心十年棄鄉井洒淚一悲吟

送客剡溪

送客山陰路春風散馬蹄縱觀神禹穴深入子猷溪嫩
草綠於染珍禽畧已啼去程千萬里步步有雲梯

歸自金陵上周益公

游戲三孤了歸來不用名昌黎前進士司馬老先生有
節花宜晚無風浪自平翳雲遮不得南極益精明

早被儒冠誤依稀老更清科名數行淚岐路一生心自

洒亡猿木誰憐躍冶金已無鐘鼎志何地可山林

方竹杖

鶴骨風前瘦龍姿雨後鮮鋒稜四面峻節操一生堅荷
蓀行隨適看山倚最便從教方有礙終不做規圓

謁京口張守

未至諸人各已侯一麾猶此滯徐州誰知安石恐不免
欲借冠君何可留遺愛與山同北固平生作計豈東周
上方已聽尚書履聲在星辰最上頭

危樓年少記登臨老矣重來力不禁風月欲談嫌許事
山川不險似人心淡烟衰草鄉關遠細草黃花節序深
只有小詩行樂處世無知己為誰吟

登清涼臺

江南江北許多山到處登臨得凭欄老木換丹霜有信
怒濤拍岸水生寒倦遊半世烏三匝往事千年指一彈
落日正西催上馬依依回首望長安

賞心亭次胡仲方韻



何人將我此來遊
白露那知客有愁
如子矜持山玉立
似予迂濶水盤洲
塵襟抖擻風雲入
石刻摩抄歲月流
惆悵謫仙鸞馭遠
離離別恨黯難收

上袁蘇州

秀骨如仙孕武夷
故家手筆世宗師
隸分唐漢諸家字
句壓陳黃二子詩
茂苑雨晴花發處
洞庭霜重菊黃時
塵埃俗吏那能比
一段奇功自可知

車馬城中早已忙
子城內裏看新郎
十州已茂園扉草

一炷初凝畫戟香
銅剖虎符新雨露
玉持使節舊風霜
明年櫻筍成時候
不在烏臺即玉堂

行盡淮南日日東
自攜隻影入吳淞
人生五馬方知貴
客老諸侯嘆未逢
適意秋風寧為鱸
驚心半夜忽聞鐘
十年無計離場屋
說著功名氣拂胸

謁江華曾宰

鬚髮已皤非故吾
依然破帽老騎驢
江南遊子斷腸句
漢殿逐臣流涕書
父祖松楸三世塚
弟兄桑梓百年居

孤丘未死歸心切未有相如駟馬車

呈徐直院二絕

竹院先生名滿世自為舉子已詩聲
春風若入五花判
莫遣紫薇紅藥驚

世間別有伊人在臺閣招徠恐未多半老
江湖半巖穴
為公一賦草廬歌

與青原正菴老

倦行老矣徧東南最後青原識正菴
無法更於身外說

有禪應許意中參
春風繞寺雨花墜
石鼎煎茶泉味甘
暫脫塵囂聊稅駕
與君相對款清談

同郭殿帥遊鳳山

廉纖小雨久於梅
喜得新晴亦快哉
五色波光麗鵲鵲
十分雲氣近蓬萊
旌旗側畔宮牆轉
戈戟叢中武庫回
走馬看花生怕晚
果然桃李一山開

過垂虹送汪仲冕

扁舟送客出姑蘇
曉泊吳江夜雨餘
波浪稍平風力定

青黃相間橋林踈匆忙亭館催行酒草率杯盤旋買魚
我欲壁間記年月無人為作小王書

贈侯戎

江淮萬里久經行此老胸中有甲兵何止據鞍猶矍鑠
試教落筆便縱橫逢時有用真才出知已不遭儒者輕
若見英雄今馬帥為言劉子太狂生

六合道中

十年曾此記來遊有策中原一戰收蒲柳易凋嫌老去

金湯無用卒和休，悲風彷彿鳴刁斗。
缺月參差照敵樓，廟食封侯何日事。
不堪羸馬又滁州。

簡能仁禮老

幻身到處等空虛，習氣依然未掃除。
柏樹子邊尋祖意，栴檀林下伴僧居。
三千世界初無礙，十二時中得自如。
半爇火堆煨芋熟，時時收拾嬾殘餘。

自述

精神凋耗鬢毛衰，劫火光中第幾回。
無可奈何教老去，

有時猛省却愁來師從道學元非偽客寄蘇州却類欬
明日重陽又佳節得錢且醉菊花杯

舟中偶作

日日拖舟上碧溪寒灘水淺草離離尺書雁斷歲行盡
帶雨風輕帆去遲白鷺導吾如有意丹楓愁客亦何為
關頭要趁梅花約更著寬程五日期

幽居

對面滄浪可濯纓不思汎舸出春城浮沈粉社何人重

俯仰茅簷是事輕
玉蕊連屏寒徙倚
葡萄上架月縱橫
江湖老矣無它願
只欲清陰便得成

春日即事

久客無人問所須
小窻翻得遂癡愚
黃昏以後酒三盞
白日之間飯兩盂
穀雨笋茶俱俊美
條風杞菊競甘腴
先賢閭域可復踐
況是平生山澤臞

除夜寄盧申之

見說盧夫子詩成手自書
雪須金帳暖雲蔭
玉川居柳

葉儲名酒萍蘢薦野蔬夜寒視犢鼻應念馬相如

郭殿帥邀遊鳳山

結束戰袍騎賜馬冠帶將軍宛如畫前呵小駐有美堂
箭去弓鳴飛鳥下青林路入轉宮堯湖亭海觀爭為高
誰知鳳舞龍飛外別有樓閣橫雲霄回旋左右皆游歷
人物江山兩英特風流標致梅嶺梅磊落襟懷石林石
側身更上天上行好風吹下咲談聲山神川后領要束
遁走虎豹藏蛟鯨摩挲苔蘚題詩去萬鼓叢中謀胡舞

衆賓捧酒壽主人將軍自是擎天柱觀山看水時一來
錢唐吳越何小哉指點中原百城在功名逼人有機會
上苑祕閣二首

郡大當塗古分符得少蓬威如烏府在令與繡衣同鈴
閣紬書外花林賣劍中少需摹撫意來作玉堂翁
疇昔經行路黃山又一過天涯知己少歲晚客愁多路
斷車生角米堅水不波史君森戟貴聞此意如何

和劉叔擬

不醉何夢飲無詩底用吟百年為客老一念愛卿深草
露青原淚烟波白鷺心班超歸未得想見舊家林

廬陵有青

原山白

鷺洲

東陽南寺

畏暑倦杯酌修廊信步行寺深藏古意蟬老帶秋聲去
就諸緣熟窮通一念輕惜無功德水為我濯塵纓

寄孫竹湖

蘇州滴酒如真珠公能醉之酒百壺得閒正恐不來耳

來則倒屣相與俱江山遠樓詩句好奔走萬變同馳驅
大草小草各有態雷電震耀鶯花姝當其半醉尚醒在
宛似處女未嫁夫杯行到手湖海竭翻覆雲雨成須臾
羲之屈使坐北面命騷如役僕與奴角巾斜飄鬚毛出
筆墨顛倒衫袖烏回旋左右如有碍記如不記長鬚扶
賓朋指摘士竊笑亦有好事描為圖或云先生鬱於用
浮沈欲以酒自娛實非能飲姑好客不時斗酒由人須
若茶乃是真飲者糟丘日月鄉何無雖然人亦難意料



未可自以為酒徒相逢脫畧邊幅盡胸次開豁無城郭
斂藏窮達寄之酒不以禮法自束拘情歸一真學無偽
滑稽玩世為通儒飲之不飲無不可醉醒醒醉同一區
癡人之前莫說夢夢中說夢愈濶迂客來輒飲飲輒醉
此其所以為竹湖不然它人豈無酒欲去此脚自懶趨
計公之客日百數結束冠帶紛坐隅欲言喉牙物為梗
中懷腹腴外示愚不知鄙性有誠實退無所攻進不諛
歐公自愛曼卿放昌黎亦善劉义龐滿城風雨重陽近

黃昏籬落金英敷山高風勁吹客倒公樓雖小主者殊
狂當相就飲一斗有酒飲我無酒沽此郎雖狂亦可喜
我去俗子疇當呼世無賀監亦已久公不容我誰容乎

村墅

俗子有錢村亦樂秋田米熟歌牛角三家村墅無官府
夜半呼盧咲聲謔尋思我輩不如君生平讀書徒苦辛
遭時間關未得志長策短藁無由伸不如賣劍買牛去
也學此翁村裏住祇恐涼夜月明時得意無人和詩句

謁郭馬帥

倪

卷三十七

千金買駿馬百城市蛾眉長安酒家樓揮灑驚人詩天子不得臣公卿氣吞之俯視兒女輩自揆男子奇誰知金陵都五斗重來茲黑貂日以弊塵埃鬚成絲故人風雨散知己今為誰郭侯山西英而有熊豹姿魏我西忠廟喬木人所思垂芳到雲仍大將奕世為兄弟各三衙父子步武隨萬戶侯冠軍金印何纍纍幹材陋宗韜勲業懷子儀方今汴都蹙似覺金祚移三關棄不守兩河

安足支復聞山以東干戈極猖披盜賊毛蝟起斂民竭刀
錐父老思漢官士卒徯王師吾君自神武妙算出籌帷
收覽天下才尺寸不可遺機會一日來恢復此其時况
如郭侯者禮賢正謙卑使之會雲龍列城歸指揮安知
古中原不使同驅馳過也久淪落狂名諸公知然亦壯
心膽志鞭慕四陸脫靴奴將軍舉扇障元規有音世不
賞詩酒聊自嬉風霜忽無情一夜冷徹肌高卧百尺樓
閉門無晨炊起視匣中劍依舊光陸離有恩或可報一

死所不辭

寄王巽伯

朋從紛如雲愈覺居索甚肺肝百憂集五夜不安枕長
恐鐵石心化作淒其錦日暮懷佳人風悄寒凜凜

江湖小集卷三十七

欽定四庫全書

江湖小集卷三十八

宋 陳起 編

葉茵順適堂吟稿

古意

悠悠澗邊人
濺濺澗中水
水流無返時
人生流水耳

偶成

春陰晴復陰
因物悟浮生
杜宇鄉心重
楊花世事輕
知非蘧伯玉
覺是晉淵明
此意誰人會
騎驢訪耦耕

蘇隄

南北山園翡翠隄，
隄邊綠漲軟琉璃。
參差臺榭無餘地，
雜遝輪蹄了四時。
楊柳又多前日樹，
梅花祇少近人詩。
停篙不看春風面，
閒伴漁翁理釣絲。

野望

白水沿隄護綠苗，
雞鳴犬卧柳邊橋。
數家雖不成村落，
一夢何曾到市朝。

次潘紫巖虎丘韻

潭深劍氣銑樹瘦嵐光薄石壇古即今藤花開又落晉
士已結廬吳市猶舞鶴沈吟發幽懷人世升藏壑

別韓菊山

結廬甫里隣顧瞻誰與遊掩荆樂魚鳥握管成樵謳有
客賞茲趣柳下時停舟自締十年契投簪不願侯一朝
過我別匪伊趨東州敢問何為爾讀書松竹幽輦母遠
之官漫作升斗謀執手話勞役揮杯忘獻酬離懷聿云
悲重來如此不何當羽厥身千里雲悠悠上下相追逐

赤城少延留其中有玉人而可為我儔此志不可得迢
迢水東流載言涉征途途修暑氣適袵絺自金玉脂車
裏糧餽我將植佳菊坐對南山秋

曲水流觴

以下十詠題竹墅

蘭亭飲者徒因物寓天理著眼靜中觀坎止流行耳

峭壁寒潭

百丈崖懸立一泓流綠漪品題無好語摹寫冷泉詩

安樂窩

受用十二時不離方寸地門外自風波行之以無事

野堂

風來無市聲景物占深淨鷗狎堂上翁時來點天鏡

竹風水月

造物無盡藏散在林泉中結亭相周旋人與萬境空

廣寒世界

鼻祖舊遊地留得老桂香有能培植之此香傳諸郎

盟鷗

同此江湖心有盟非知己我亦畏機人莫入驚波裏

得春橋

策驢風雪中東君獻詩料花驚非故吾聊復索花笑

賞心橋

公隄過竹所履聲驚龜魚人生適意耳何必駟馬車

尋源橋

蹊蹠水窮處雞犬非人間褰裳不用涉迤邐逃秦山

愛閒亭

僧舍

苔深雨徑寒花落徑爛斑此處無名利誰人肯往還性
慵碁局廢坐久茗甌閒禪觀非難事休官學住山

江湖偉觀

此地舊寒碧留題護竹君憲虛不礙月壁老易生雲一
水東西隔兩山南北分未堪低著眼世事正紛紛

何氏書堂

晉何楷讀書之地因名何山

千歲松陰護一亭風來猶帶讀書聲雖無芳史摹勲業
自有青山說姓名客撫豐碑苔剝落春歸暗徑草生成

幾年訪古謀清隱好借虛簷著短檠

天平山謁范文正祠登白雲亭

為謁先儒馬鬣瑩倚藤得得上天平直疑寺外峻嶒石
猶是胷中數萬兵松障四開心目快山泉一軟骨毛清
坐間恰動思親念隱隱白雲何處生

次林和靖先生梅韻

世上羣芳未敢妍獨將春色占南園生來清質十分瘦
肯受紅塵一點昏東閣詩成應動興西湖僊去漫招魂

便須結客陪花笑勾引幽香入酒尊

蟠松

靈巖寺草堂之前舊有蟠松元古

一畝清陰覆客衣相逢疑是草堂時
隱然錯節盤根勢欠者昂霄聳壑姿
天遣蟄龍憑石窟人攀巢鶻俯霜枝
百年培植今誰屬何待歲寒然後知

松本潘氏之物今歸于鄭

寄所思

浙浙竹下風活活橋畔水蕭蕭掩柴荆
去去隱君子夙夜勞我思之德洵且美
瞻彼南山阿有桂發叢蘂奮手

折其繁懷袖香盈只願為靈鵲飛遞聲入君耳

春去

幾陣紅侵野草一團綠染庭槐夢裏未知春去翩翩蝴蝶飛來

歸途

春來天氣半陰晴那更奔馳一月程又恐花時成草草還家插柳佐清明

山行

青山不識我姓字我亦不識青山名
飛來白鳥似相識
對我對山三兩聲

次出郊韻

支藤乘興入春郊
梅壓疎籬亞竹梢
剩此閒行詩有料
吟來渾不費推敲

生日口占

舉室相先起五更
為翁誕日壽金觥
癡兒未識翁年甲

五十年前今夜生

時年五十一

酒邊次趙東閣韻

竹根粉痕新銷磨九十春中年真率性上古太平人有
夢詩將聖無愁酒不神靜看紅紫路翻覆幾回程

友人自淮至

別子若為久于心終不忘一杯評舊雨兩鬢對新霜客
裏春行早愁邊夜坐長明時成擯弃無語及淮鄉

雪城

愛向其中艤短棹眼前景物總玲瓏神僊窟宅垂楊裏

圖畫溪山落照中甚是繁華輸俠少也須幽勝屬衰翁
世間風月無如此賣鶴來謀地一弓

次中秋不見月韻

五分秋色到銀河應是蟾蜍浴細波握手相期千里共
舉頭無奈片雲何愁邊幸自逢歡伯清處何須著艷娥
未可來宵倦遊賞光輝依舊向人多

雨中梅

玲峴竹外枝啼粧凌曉霰東君不主盟對人作此面

即事

竹暗筍無數江晴水有痕
田蛙喧麥隴野犬卧柴門

過溪

筍輿軋軋亂山中
籬落桃花潑眼紅
小駐渡頭呼艇子
一溪淺綠漾晴風

白髮

半世持竿笠澤濱
鬢邊留得幾莖春
近來白髮無公道
暗把黑頭饒貴人

泊舟溪口

萬柳陰中繫客船
柔條如竹葉如錢
大姑小婦挑甘薺
攜手烏兒正二眠

賦順適堂

取少陵洗然
順所適之句

暗觸少陵機
茅居峙竹扉
安時貧亦樂
聞道詠而歸
鳬鶴從長短
鳬魚自躍飛
吾猶臧穀耳
夷跖是耶非

除夜立春

別歲傳佳話
論文憶舊盟
黃柑凝臍釀
爆竹帶春聲
節

序有終始兒童爭送迎此身強健在刻炬到天明

梅

疎影幾黃昏明明野水濱未風先信息無雪更精神一
白見真色萬紅隨後塵自來花下飲肺腑盡生春

晉子生日

今朝阿晉紀桑弧郎罷持杯勉讀書斷莫繞家覓梨栗
更須為國習耘鉏義方授汝心還愧陰德於子計肯踈
學取老萊如許壽年年綵袖拜庭除

自和

壯士須張燕角弧男兒須誦聖人書譬如田叟祈多稼
未有春時不荷鉏分內功名從早晚腹中學問怕空踈
老夫猶記昌黎語潢潦朝盈夕已除

又 有感

一鴈雲間落勁弧經秋不見寄來書人情自昔如翻紙
世道從今甚借鉏鹿夢墮中知得喪爵羅門外看親踈
歲寒獨有梅花月香影年年到戶除

別可行

松江之左可漁可農古樹陰陰碧波溶溶予契予好攜
家而從載笑載語乃棹輕篷冥訪前修天隨室邇中心
孔嘉爰居爰止有薰自南景物清美槐柳于前敲蒸潛
弭我有旨酒與子酌之既醉既舞且歌而詩陶然樂只
厥情怡怡一日舍去豈不念茲客懷先秋興言欲別屢
止屢辭行計已決送子于舟期我乎雪敬哉前邁于時
炎熱惆悵若失延佇長津復面猶賒奈何夕晨豈無他

友白首如新念子實繁融融天真北山有杻南山有雲
下有猿鶴中有隱君千里命駕余敢不塵乃志必獲載
歌斯文

止庵

驛路施茶

時事艱難路險巖得來名利亦何為趙州茶罷速歸去
莫待鐘鳴漏盡時

讀釣臺集

萬仞山頭放一絲爭吟好句記當時能詩若不能垂釣

祇恐先生不愛詩

遊西洞庭山

漫遊三十載，屐齒暈蒼苔。
兩地無多里，一生能幾回。
洞深龍未蟄，丹熟竈無灰。
已覺忘身世，松梢有鶴來。

山行

未了行春債，因哦遣興詩。
寒多啼鳥噤，路滑蹇驢遲。
久雨紅辭樹，深林綠授枝。
驚心衰朽日，容易過花時。

入山

到來非俗境一片隱心生曉霧沈山色春禽和水聲逢
人多古貌對語率真情同在無裛世爐熏答聖明

蟬

柳外聲殘日未殘棲身未穩擇枝安不須過有螳螂慮
黃雀從傍冷眼看

螢

自明自滅度方池熠熠飛來去覺遲入坐點衣情分熟
納交元在讀書時

蚤

壁間吟不待秋時吟苦中宵動客悲勸汝不須催婦織
家家五月賣新絲

酷暑

動息汗流珠無風可滌除炎威獄下吏生意鼎中魚席
地杯水水扃門謝客車因思遊宦者曾未憶家居

秋至

節序暗推移清商漸戒期旅懷蚤早計涼信柳先知萬

事到雙鬢餘生消幾詩最憐梁上燕巢穩又歸時

苦雨

農事正紛紛天時異所聞舉頭方見日翻手又為雲茅
舍蛙分部槐庭蟻失羣裁成憂國疏齋沐告吾君

出郊

多謝天公佐好晴只今載酒作郊行飛花戀客閒中意
遠笛吟春景外聲已把物情歸幻相且將足力趁浮生
南堂辦得休休記燕雀充庭亦賀成

謝朱宜中隸字

隸法如公有典刑拙中藏巧混天成因觀體製超前輩
旋闢軒窗乞扁名氣象晉人遒且勁源流漢刻古而今
得來喜對兒曹語一字千金勝滿籬

鱸膾

圍圍洞庭陰西風苦不情墮冒雲葉亂落刃雪花明列
俎移桃菊香麇搗桂橙四腮傳雅詠巨口竊嘉名誤上
僊翁釣因陪楚客觥甘腴殊机肉鮮脆厭侯鯖銀鮒將

同調絲萼久共盟祇緣鄉味重自覺宦情輕風度偏宜
酒頭顱尚可羹謫仙空汗漫何處贈長鯨

竹夫人

風神林下秀寵數夢中新假使不如肉爭知見似人茗
奴甘謝事黃妳喜論親凜凜百年操從教進退頻

王夫
人神

情散朗有林
下風晉傳

城下小庵

水綠城詰曲水際暗桑麻籬落深村路閭閻處士家烟

篁黏半籜風柳颺輕花隨喜跢跢坐香寒月影斜

棹雪

舟名

放船中流天模糊浙浙霎霎鳴菱蘆萬頃剎那成玉壺
柔艫蕩漾歌吳歛老漁直前相招呼骨相子猷洵且都
其人豈是斯人徒相顧而咲掀虬鬚汝為汝兮我非吾
剡溪風景今何如誰能為人作畫圖予方奮臂持竿獨
釣于江湖

壽藏十韻

門限何須鐵因為淺近謀假令長富貴消得幾春秋壽

固緣心地人誰免首丘未能忘後慮是亦慕前修繭室

名猶在

澠水燕談王樵自號贅世翁預卜為窮名繭室

魚山志可求

曹植登魚山有終焉

之嘆遊迴岡許堤骨吉兆協眠牛懶作化臺號

唐史姚密孫勗

自為壽藏于萬安山

何妨引客遊

唐司空圖豫為冢棺引客遊塲中賦詩酌

酒不愁飽螻蟻

莊子曰在上為鳥在下為螻蟻食

最喜近松楸物變終

于盡吾生行且休年年春色裏洗勺聽溪流

田父吟

去年積潦苦無收今歲逢人說有秋
未擬香粳供一飽
糝糝新藁覆簷頭

又

夜登車桁畫耘秧怕說風傷與水傷
歷盡艱辛雙鬢白
今秋方覺稻花香

又

老天應是念農夫萬頃黃雲著地鋪
有穀未為兒女計
半償私債半官租

又

記得年時竈不烟土倉今番遠門邊已占此後無憂色
綠遍村前菜麥田

又

逢逢社鼓佐豐年酒熟那逢釀雪天擘橘煮雞償一醉
布衾烘暖抱孫眠

林可山至

梅花山底伴雲間謾逐閒雲出故山君慰我思君莫去

一詩先遣白雲還

雜興

兀兀北窗下
嘈嘈林間鳴
聲各奏小大諒
亦隨其形倏
然氣肅冽
夕俱沈冥
試語塵中士
細聽秋蟲聲

七十一
云古稀予年三之二
來景殊無多
那復就枯瘁
窘步驚畏途
撫心慨時事
何以怡餘生
一日委一醉

江湖小集卷三十八

又

記得年時竈不烟土倉今番遠門邊已占此後無憂色
綠遍村前菜麥田

又

逢逢社鼓佐豐年酒熟那逢釀雪天擘橘煮雞償一醉
布衾烘暖抱孫眠

林可山至

梅花山底伴雲間謾逐閒雲出故山君慰我思君莫去

一詩先遣白雲還

雜興

兀兀北窗下嘈嘈林間鳴聲各奏小大諒亦隨其形倏然氣肅冽夕俱沈冥試語塵中士細聽秋蟲聲

七十云古稀予年三之二來景殊無多那復就枯瘁窘步驚畏途撫心慨時事何以怡餘生一日委一醉

江湖小集卷三十八